



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

**Ein Sermon von sanct Peter vnnd Paul den heyligenn  
tzwolff boten/ vom vortrawe[n]**

**Luther, Martin**

**Erffurdt, 1523**

**VD16 L 6615**

Predig D. Martin Luthers von Sant Peter vnd Pauel der heyligen  
zwölffpotten/ geprediget tzů Wittemberg.

**urn:nbn:de:hbz:466:1-32005**

# Predig D. Martin Luthers von

Sant Peter vnd Paul der heyligen zwölff  
potten/geprediget zu Wittemberg.

(8)

Luce.v.

Das Euāngelium ist leicht denenn die da glauben/vnd helt vns tzwāy stuckt fur. Nemlich/den glauben/vnd tzeitliche gütter/vn glauben vn ewige gütter. Zum ersten tzeucht er an/das die an inn glauben auch tzeytlych müssen gnüg haben/das tzaigt er an/dāher sant Petro vnd seinen gesellen als vil visch gibt/vnd meer dan sy hetten begerū dursfen. Also/das er auch sorget wie er vns denn bauch erneren will/wen allayn der verflücht vns glaub thet. Dann secht hie sant Peter an/vnnd secht im wol ins hertz hinein/da findet ir/das er mit mainet/das er solt als vil visch fahen. Noch kompt got her vnd tringt sy hinein/vnd meer dan sy begeret hetten. Darumb ist das ein ErempeL/das gar mechtig antzaigt/das die genüg müssen haben die da glauben. Widerumb die da mit glauben/die kunden mit gnüg/vnd kain riuw habenn/bis sy die guttr tzusammen bringen/damit sy dann in alle la ster fallen, wie sant Paulus sagt.i. Ad Timoth. vi: Wen wir haben speisz vnd klayder/so sollen wir vns benügen lassen. Dan die da wöllen reich werden/die fallen in versuchung/vnd in des teufels strick/vnd in vil vnnutz schädlich begird/die den menschen in die hell furen/dann der geit ist ein wurtzel aller sund/welche etlich begeret ha ben/vn also von dem glauben getreten seind/haben sich in vil bekummerlus eingewickelt. Nun der spruch sant Paul tzaigt klarlich an/was vns

A ij

serm vnglauben nächfolg/ nemlich das der vns  
glaubig vnd geitzig muss in des teufels strick fal-  
len/das kunden wir aber nun nit sehen/dan es ist  
geistlich/wen wyr aber sehen möchten den schat-  
ten/den der vnglaub thut in geistlichen dingenn/  
als den/den er thut in leiblichen/so hetten wir gut  
predigen/dann wir sehen eußerlich/wie ainn vns  
glaubig man scherret vñ thut/das er allein mug  
zusammen kratzen/das er sich darauff verlassen  
mug/vñ sagen.Ey nun hab ich genug.Wa sehen  
wir wie ein vnglaubig man ein solch vnfreuntlich  
geitzig ding ist/der thut nyemandt guts/ist auch  
niemandet freuntlich/verkäufft auch nyemandt  
nichts er sehe dan seinen vortail.Secht/ain solch  
vermaledeyet ding ist es vmb den vnglauben/das  
wir nit Got über denn bauch kunden trawenn/  
föchtenn ymmer zu wir werden hunger s oder  
dursts sterben/so wir doch müssen gnug haben/  
wie Got sagt Abthei. vi.Secht an die feldblüm/  
lein/wie sy wachsen/sy arbeyten nit/spinnē auch  
nit/vnd seind doch also getziert/das Salomon in  
aller seiner eer nit also getziert ist/als eines auss  
den:Secht/weill got fur die blumleynn also sorg  
tregt/vnd schmuckt die so hupsch/vil mer will er  
vns geben wüs vns not ist.Noch kunden wir nit  
trawen/also hat vns der Teuffel gefangē in sey/  
ne strick/vnd da muss auch also bald aufhoren  
die liebe gegen den nächsten.Wa das vertrawenn  
nit ist/da thut man niemant guts/scherret allein  
auff sein haussen/vnd daher ist auch kömenn der  
geistlich stand/pfaffen vnd munich auff das sy  
sich allain behulffen/vnd den bauch ernerten vñ  
mit arbeyten durfftē/seind sy in die kloster gelos-  
fen/vnd ist ein recht sprichwort wordē.Vertzwey  
flung machet ein Abmunch/ia nit allein Abmunch/od

noniē sonder auch Pfaffen/Bischoff/vn Bāp st/  
dan sy trawen mit das sy got erneuen kund/vnnd  
gedencken allein/das in alle gepochlichkeit möcht  
entnommen werden/das ist alles gelebt im vn/  
glauben. Darnach geend sy hin vn halten hüren/  
oder eebrechen/das seind alles die frucht die dem  
vnglauben nachfolgen/dan sy vertrawen got nit  
so vil/das er sy ernenen kund/so sy weiber nemē  
vnd bliben heraussen. Nun das ist das exemplē  
das vns raitzt/das wir im tzum ersten vertrawos/  
en den bauch/dan er sorget fur vns auch in tzeit/  
lichen gutern/das sehenn wir in Petro/do er als  
vil visch fyeng/vnd fielen im mit haussen zu. Da  
mit ist klarlich angetzigt/das got keinen verlass  
sen will/er muss genug haben/so er nur allein ver  
trawet/wie der Psalm.36. sagt. Ich bin ung ges/  
wesen/vnd bin alt worden/vnd hab nit gesehenn  
das ein gerechter sy vlassen worden. Es feylet nit  
an gutern/sonder allein an dem glauben/es muss  
ten ee die engel vom hymel herab kommen vnd ges/  
ben. Aber das nunn die leut also not leiden/das  
mächt allein der vnglaub. Nun ob got gleich wol  
nach bey vns ist/vn fur vns sorget/so wil er den/  
noch die tzway von vns haben/arbeit vnd hoff/  
nung/ob ers ein wenig vertziehen wurd. Dan er  
heyst hye Petrum ein vischtzug thun/vnnd sagt:  
Wirff deinn netz eyn/vnd thu die arbeit die einem  
vischer zugehort/vn lass mich sorgen. Das schet/  
det nun wol/arbeit vnd sorg/die arbayt nim du/  
vnd lass im die sorg/gee hyn vnd treibt dein hantz  
werck/vnd libe dein leib das er gee in arbeit/vnd  
lass in sorgen/die sorg wil er dir nit lassen/sonder  
die arbeit. Das wollen wir nun vimbkeren/sorgē  
wollen wir/vnd inn arbeitē lassen. Dan warumb  
geytzet der wucher also? Was er mocht alleynn  
nit sorgen vnd nit arbayten.

A iii

Darumb lasz deinen got sorgen wie die visch in dz  
netz kommen / vnd gee dn hin / vnd nyñ ein stand  
an dich / darinn du arbaitest / so wirst du wol ent  
halten werden. Wir wollen aber laider all sollych  
stand furen / das wir nitt arbayten durffen / dar  
umb seind wir much vnd pfaffen worden / allein  
das wir iunckherrisch lebten / vnd nit arbayten.  
Darumb habenn die muter ire kinder in die schul  
lassen geen / das sy gut tag hetten / vñ got dienenet /  
damit ist es da hin kommen / das man nit gewist  
hat / was ein gut leben gewesenn ist / so doch gott  
befilcht / vnd hat ein wolgefalen daran / das ma  
das brot im schwätz esse. Gene. iii. Und ye tyeffer  
du in dem gesetz steckest / ye besser er ist. Darumb  
arbayt du / vnd glaub / vnd lasz got frey wälten.  
So sagen sy dan wen man von dem glauben redt.  
Ja ich must lang glauben / das mir ein gebratenn  
taub ins maul fluge / so ich nit arbayt. Ja es ist  
war / du solt arbayten / zu arbayten ist dir gebot  
ten / aber lasz dein got sorgen / glaub du alleyn / vñ  
arbait / so wirt dir nit allein ain taub / sond auch  
wol ein gebraten gäns ins maul fliegen. Das an  
der stuck das got vonn vns haben will / das ist /  
das ma sol hoffen / ob es gleich got ein wenig ver  
tzeucht / darumb last er sy hye dye gantzen nacht  
vischen / vnd dennoch nichts fahenn / Da last er  
sich ansehen / gleich als wolt er sy hungers lassen  
sterben. Da het sant Peter wol mugen gedencken  
do er so lang vischet vñ nichts sieng / nun wil mir  
got den bauch verschmachtenn lassen. Aber er  
thets nit / arbaitet ymmer an / vñ hoffet got wurd  
sins geben / wie wol ers vertzug. Da kompt dann  
got her / vñ gibt im als vil außein mal / vñ meer /  
dan er vil leicht hette in acht tagen kunden fahen  
Darumb must du die zwey stuck wol lernen das

du arbätest vnd hoffest/ ob ers gleych aßt wenig  
vertziehen wurd/dan wen er dich gleich ein wenig  
auffzeucht vñ arbeiten last ym schweiss/das du  
yetzund meinet/dein arbeit sy verloren. Da must  
du klug sein/vñ dein got lernen erkennen vñ trawo-  
en/so kompt er den her/vnd gibt dir meer dan du  
verhoffet hast/wie er hie sant Peter thut. Darüb  
wen dich schon got ein wenig auffzeucht so denck.  
Ey ist es doch sant Peter auch also gangen/vnd  
darnach dennoch reichlich begabt worden. Also  
schlags in seinen guten willen/vnnd lasz darumb  
nit ab/sonder stee vnd hoff/so werde deyne werck  
gulden/dan darumb vertzeucht er dich/das deine  
werck gulden werden/dan da hat die hoffnung vñ  
der glaub stat/wen er vns vertzeucht. Darumb  
muss er ein tzusatz dartzu thun/vnd ein kostlichen  
stein darann henckenn/das deine werck wichtig  
werden/der edel stein ist der glaub. Aber der an-  
dern vnglaubige werck seind ströin/dan sy seind  
nit gebauwen auff den gläuben.

Der ander. Wo sy nun die visch gefangen/vnnd  
die frucht des glaubens geschmeckt/da wirdt d  
glaub gemeeret/vnd nimpt tzu. Nun dahin muss  
sen wir kommen/dz wir got kunden vtrawen den  
bauch/dan wer nit got den bauch vertrawē kan/  
d kan im nimmermer die seel vertrawē. Aber das  
ist allein der kinder glaub/da lerne wir an krucks-  
en geen/da saugen wir noch die brust. Wardurch  
mussen wir lernen das wir got vertrauen auch  
die seel. Wo nun Petrus sicht den vischzug/felt er  
nider/vnnd demutiget sich so gros/das er sagtt:  
Ach got gee von mir/ich bin ein sundiger mensch.  
Da last Petrum ein figur sein/deren/die da glau-  
ben sollen die ewigen guter/vñ halt in fur ein ges-

wissen/das da yetzūd auff die andern guter wārt/  
tet/vnd steet. Ein sundtlichs gewissen ist von na-  
tur also/das es also thut/wie hie Petrus/das es  
fleucht vor seynem hayland/vnd denckt. Ach got  
ich bin nit wert/das ich sol selig sein/vnd vnder  
den heiligen vnd Engeln sitzen. D das gutt ist vil  
zu hoch/da kan das eyning gewissen nit begreiffen  
die grossen guter/vn gedenkt/ia wen ich wer wie  
Petrus vnd Paulus/so mocht ich wol glauben.  
Das ist ein nerisch vnd verdamlich ding/so wol  
test du dich auff dein heyligkeit setzen/so hettest du  
dan auff den sand gebawen: Aleyn. Sonder thu  
wye hie sant Peter/dan in dem das er sich so ges-  
ring helt/da wirt er erst recht wirdig/eben darüb  
das du ein sunder bist/darumb must du truwen.  
Da must du dein gewissen weit auffthun/vnd dein  
hertz gros auffplasen/dz die gnad hinein gang.  
Wie sant Gregorius sagt/wen du got nunn erkent  
hast/so schlag in ia nit ausz/das ist/wen wir die  
grossen guter sehen/da sollen wir nit vertzagen/  
es ist recht das wir vns erkennen/vnd ye tieffer ie  
besser. Aber die gnad must du nit außschlage vmb  
deiner sund willen/dan wen du fulest/das deynn  
gewissen tzwoyfelt/vnd wil den herren ausztreiben  
so bist du am allerbequemste/wie Abicheas sagt  
.vij. Domine quis similis tue deus. D herz wer ist  
dir gleich/der du die sund wegnimpft/vnd wirfs  
fest sy in das meer vnd ertrenkest sy. Alle die nit  
die sund wegnemen/die seind abgoter. Darumb  
sagt er wol/das vnserm herrenn kain got gleich  
sey/dan die andern got wollenn frumkait finden  
vnd nit bringen. Got der herz bringt sy/vnd finde  
sy nit. Darumb must du nit vertzagen/dan ye  
schandtlicher du bist/ye ee die gnad eingeet. Vlun-  
der grost hauffenn geet dahinn/das ehr sich will

schmucken wie ein ketzlein an der sonen / vnd dar  
nach sol sy got annemen. Nein. Dan die schrifft  
preyset got also/das ehr wegnem die sund / vnd  
werff sy in das meer / also musz es sein. Petrus/  
do er sagt ych bin ein sunder / da thut er recht an/  
es ist war / er hat wol vrsach / das er sich forchte  
mag vnd demutigenn. Aber er musz nit got hyns  
weg schlagen / sonder außnemen. Darumb wenn  
ich mein sund merck / vnd wird hiesant Peter / vñ  
empfind das ich yetzundt lauffenn will fur got /  
da musz ich mych erst vmbkeren / vnd neher vnd  
neher tzo im treten / dann so ehr geflohen seyn  
wolt / vñ wolt nit die sund hinweg nemen / so wer  
er nit tzu dir kommen / vñ wer dir nach geloffen /  
Darumb ye meer du fulest / das du ein sunder bist  
vnd ye meer du von Got lauffenn wilt / ye meer du  
tzu im tringen solt. Darumb mercket das wol / da  
wie hiesant Peter hie thut / also thund alle gewissen /  
dye erschrecken vor yren sunden / vnd wollen von  
got lauffen / vnd an andern abgot suchen / da las  
man nit ab / sonder tret frisch hintzu vñ hält sich  
an got / sunst wen man wil hin vnd her lauffen /  
werck vnd hilff suchen an einem andern got / vnd  
hindennach kommen / da findet man got nymer /  
gleich wie die tollen funckfräwen / do sy hingegenn  
vñ wollē öl kauffen / so wirt die thur zugeschlosse .

Nu sagt got. Forcht dir nit / das ist ein Euans  
gelißch wort / damit die schwachē gewissen getrost  
werden. Also machet vns Got vnsere werck vnd  
verslichüg gulden. Secht nu wie er fur vns sorget  
leiblich / das er im hie gibt als vil visch / so er doch  
an tzwäyen het gnüg gehabt / vnd macht in auch  
geistlich also vol vnd reich / das er auch sol den an  
dern mit seiner volle mitteylen / vnd macht in hye

B

zu einem visscher leiblich vnd geistlich. Lieblich/ver  
kaufft er sy/geistlich sol er ein vischer der mensch  
en sein/dan er hat das Euangelium/vnd sol dye  
andern leut auch hintzu bringen/vnd das reych  
Christi meeren. Secht also kompt es/wa man  
glaubt/da gibt Got so vil/das man nit allein den  
leuten hilfft eußerlich mit seiner h̄ab/sonder auch  
inwendig bricht herausz/vnd leeret/vnd macht  
auch reich inwendig/dan ein solcher mensch kan  
nitt schweigen/er muss den andern verkundigen  
vnd sagen/wie es im gangen ist/vnd brycht also  
herausz ins Euangeliu/wye der. so. Psalm sagt.  
Wen du nun hast mir ein reinen geist geschaffe/so  
wird ich verkündigen dein wortt/vnd die sunder  
zu dir bringen. Item ich hab gelaubt/darumb  
hab ich auch geredt. Das ist mir ein wunderbar  
lich consequentia. Aber also volget sy. Wen ych  
glaub/so erken ich got/so sihe ich den was anden  
leuten feylet/da muss ich den reden. Secht/wen d  
glaub noch jung ist vnd klein/da ist auch das gut  
zutzeiten klein vnd gering/das wir sollen lernen  
got erkennen vnd truwen/vnd wir nu dahin kom  
men sein/das wir frey truwen/so kan es uns nit  
feylen. Da schut vns den got vol leiblicher vñ geist  
licher guter/vñ mit einem sollichen vber schwenck  
lichen schatz/das wir allen leuten helffen kunde/  
das heist die armen leut reich gemacht/das heist  
nun die hungerigen gespeyset.

## Got sey lob/vmb sein wort.

Gedruckt zu Erfurdt/tzu dem Buntten  
Lauwen bey sanct Pauel.

1523.